

Hikmah Hari raya

Hari raya adalah suatu hari kesukaan yang dirayakan pada tiap-tiap tahun oleh semua manusia yang terdiri dari berbagai-bagai bangsa dan agama di dunia ini. Dari sejak manusia mengenal masyarakat dan mempunyai adat kebudayaan, dari sejak itulah mereka mulai menciptakan hari raya, hari bersuka ria setelah mereka menempuh segala ranjau dan penderitaan hidup selama setahun.

(Oleh: ‘Abd al-‘Azīz al-Murshidī)

Hari raya umum:

Tujuan manusia menyambut hari raya itu kadang-kadang didorong oleh perasaan ingin melepaskan kegirangan jiwa dari belenggu tanggungjawab-tanggungjawab yang telah sekian lama mereka laksanakan terhadap peribadi, keluarga mahupun masyarakat. Kadang-kadang didorong oleh perasaan ingin menzahirkan kesukaan hati selepas menerima nikmat hidup yang dikurniakan Allah kepada mereka.

Kadang-kadang tujuan manusia mengadakan hari raya atau hari-hari kesukaan itu ialah semata-mata untuk memperingati sesuatu peristiwa yang berlaku di dalam sejarah sesuatu bangsa atau kaum. Seperti memperingati hari kemerdekaan sesuatu negara setelah rakyatnya hidup tertindas beberapa lama di bawah cengkaman kuku besi kaum penjajah, memperingati hari pahlawan yang gugur bertempur di medan perjuangan. Tegasnya hari raya yang berbentuk kebangsaan sering kali dirayakan kerana memperingati peristiwa-peristiwa yang berlaku di dalam sejarah sesuatu bangsa.

Hari Raya Islam:

Kemudian datanglah Islam memancarkan sinaran sucinya ke seantero alam. Sewaktu Rasulullah *sallā Allāhu ‘alayhi wa sallam*

wa sallam masuk ke Madīnah al-Munawwarah membawa Islam, maka baginda dapat penduduk-penduduk kota Madinah mempunyai dua hari raya dalam setahun, yaitu hari raya yang mereka warisi dari datuk nenek mereka di zaman Jahiliyyah. Tujuan agama Islam diturunkan bukanlah untuk membasmikan menghapuskan adat kebudayaan sesuatu bangsa selagi adat dan kebudayaan itu tidak bertentangan dengan ajaran-ajaran suci yang dibawanya. Islam datang dengan tujuan untuk memperbaiki dan mempermaksa peraturan hidup manusia yang berada di alam kejahilan dan kesesatan supaya mereka menjadi suatu bangsa yang maju dan bertamadun.

Oleh yang demikian Rasulullah *sallā Allāhu ‘alayhi wa sallam* tidak mahu menghapuskan kedua-dua hari raya yang dimiliki oleh penduduk-penduduk Madinah yang taat setia kepada ajaran-ajaran Islam itu, malahan baginda menggantikannya dengan dua hari raya lain yang dinamakannya: “Aidil Fitri dan Aidil Adha.”

Hari Raya Agung dan Kecil:

Dalam Islam Aidil Adha dinamakan “Hari Raya Agung” atau Hari Raya Besar, dan Aidil Fitri dinamakan “Hari Raya Kecil”. Kedua-dua hari raya besar dan kecil itu

mempunyai keistimewaan sejarah yang bersendirian. Hari Raya Aidil Fitri ialah sebagai memperingati sejarah perkembangan agama suci hingga berdirinya sebuah empayar Islam yang gagah perkasa, empayar yang mempersatu-padukan seluruh manusia: “*Innā khalaqnākum min dhakari wa unthā wa ja‘alnākum shu‘ūban wa qabā’ila li ta‘ārufū.*” Sesungguhnya Kami (Allah) telah menjadikan kamu lelaki dan perempuan, dan Kami jadikan pula kamu berpuak-puak dan bersuku bangsa supaya kamu di antara satu sama lain dapat berkenal-kenalan. Aidil Fitri hari pengasas dan pelaksanaan, Aidil Adha hari penutup dan penyempurnaan: “*Al-yawma akmaltu lakum dīnakum wa atmāmūt ‘alaykum ni‘matāt wa rađītu lakumu al-Islāma dīnā.*”

Hari ini Aku sempurnakan bagi kamu agama kamu dan Aku perlengkapkan ke atas kamu nikmat-Ku dan Aku reda Islam itu menjadi agama kamu.

Setiap umat yang baharu bangkit tidak melupai akan keagungan dua hari raya yang mereka tempuh di dalam sejarah perjuangan mereka menegakkan negara. Yaitu pertama hari mengasas tapak negara itu, hari yang kedua ialah hari selesainya pembinaan asas itu. Begitu pula halnya dengan Islam, ia tidak sekali-kali

melupai dua hari yang paling bersejarah di dalam pembinaan dan kebangkitan yaitu “Aidil Fitri” sebagai hari pengasas dan “Aidil Adha” sebagai hari sempurnanya asas-asas Islam yang teguh dan kuat.

Nikmat Kemerdekaan:

Aidil Fitri selain daripada keistimewaannya yang pertama – dari segi perletakan asas pembinaan Islam – maka ia ada mempunyai keistimewaan yang lain – dari segi kemerdekaan seorang hamba – Aidil Fitri jatuhnya tepat pada hari pertama setelah selesainya umat Islam menunaikan ibadah puasa selama sebulan. Pada hari itulah umat Islam kembali kepada kebebasan peribadi setelah di sepanjang bulan Ramaḍān terpaksa menahan diri daripada makan, minum dan menahan diri daripada melakukakn adat-adat yang lazim mereka kerjakan setiap hari di sepanjang tahun.

Kalau mereka tidak meyakini bahawa amalan puasa yang merampas kemerdekaan dan mengubah adat cara hidup mereka sehari-hari ini adalah suatu perintah dari Allah, maka sudah tentu pekerjaan berpuasa yang memisahkan mereka daripada adat yang biasa mereka lakukan pada setiap hari itu tidak mahu mereka kerjakan dengan begitu taat dan amanah. Tetapi bagi setiap manusia yang beriman, menjunjung perintah Allah itu lebih bernikmat daripada ia melakukan sesuatu pekerjaan yang lain. Itulah dia sifat-sifat orang Mukmin yang mendapat pertunjuk dan hidayah daripada Tuhan.

Selain daripada kita jumpai di dalam

menyambut kedatangan Aidil Fitri peringatan yang merupakan asas pembinaan Islam di sana banyak lagi kita dapat nikmat-nikmat lain yang menggambarkan begitu lazatnya menunaikan ibadah puasa di sepanjang bulan Ramaḍān itu, didapati pula bagaimana lazatnya perasaan kembali kepada kebebasan dan merdeka melakukan adat yang biasa mereka lakukan pada setiap hari. Kerana Aidil Fitri mengandungi beberapa hikmah dan faedah yang tak dapat dinilai dengan perhitungan harga. Aidil Fitri mengandungi kegembiraan, mengandungi ziarah-menziarahi, kunjung-mengunjungi bagi merapatkan silaturrahim dan memperkuatkan perpaduan jiwa dan tenaga di antara umat Islam.

Aidil Fitri juga menggambarkan hari kembalinya kaum Muslimin daripada pengembalaan rohani dalam masa sebulan di sepanjang bulan Ramaḍān, di sepanjang pengembalaan itu sudah tentu mereka menempuh berbagai-bagai kesulitan dan penderitaan yang belum pernah mereka rasai. Betapa gembiranya sewaktu mereka sampai ke tempat yang dituju dengan aman dan selamat pada 1 haribulan Shawwāl yang dinamakan Hari Raya “Aidil Fitri” itu.

Selepas itu mereka menyambung pengembalaan itu kepada suatu pengembalaan yang lain iaitu pengembalaan jasmani menunaikan fardu haji dengan hati yang tabah dan iman yang teguh. Itulah dia pengembalaan haji yang dimulai daripada hari Aidil Fitri hingga 10 haribulan Dhū al-Hijjah yang dilakukan oleh setiap umat Islam yang mempunyai kemampuan paling kurang sekali dalam seumur hidup.

Firman Allah: “*Al-ḥajju ashhuru ma‘lūmātu fa man faraḍa fī hinna al-ḥajju fa lā rafatha wa lā fusūqa wa lā jidāla fī al-ḥajj, wa mā taf’alū min khayri ya‘lamhu Allāhu wa tazawwadū fa inna khayra al-zādi al-taqwā.*” Ertinya: Musim haji itu (hanya) beberapa bulan yang termaklum. Oleh itu barang siapa yang telah memberatkan (di atas dirinya ibadah) haji – di bulan-bulan tersebut itu – maka ia tiada boleh sekali-kali *rafatha* dan tiada boleh sekali-kali *fusūq* dan tidak boleh sekali-kali berbantah-bantah di dalam ibadah haji. Dan apa kebaikan yang kamu buat, diketahui oleh Allah, dan hendaklah kamu mengambil bekal, kerana sebaik-baik bekalan itu ialah sifat takwa.

Keterangan Ayat:

Musim orang-orang Islam mengerjakan haji itu tiga bulan iaitu Shawwāl, Dhū al-Qa‘idah dan Dhū al-Hijjah – yakni dalam bulan-bulan tersebut boleh seseorang itu berniat untuk mengerjakan ibadah haji – dan penghabisan pekerjaan haji itu ialah pada tanggal 10 haribulan Dhū al-Hijjah. Dan barang siapa sudah memakai ihram serta sudah berniat mengerjakan ibadah haji, maka pada ketika itu ia tak boleh *rafatha* – diertikan sentuh, dan sentuh itu ada tiga macam:

1. Sentuh dengan lidah, iaitu mengeluarkan perkataan-perkataan kepada isteri tentang hal persetubuhan yang mana tidak manis didengar oleh orang lain.

2. Sentuh isteri dengan tangan, sentuhan mana tidak patut dilihat oleh orang lain.

3. Sentuhan badan, yaitu

percampuran yang sudah maklum
(bersetubuh).

Maka setiap orang haji yang sudah berihram dan berniat haji atau umrah, dilarang mengerjakan pekerjaan-pekerjaan tersebut, terutama sekali mengeluarkan perkataan-perkataan kotor yang memang terkeji.

Fusūq: Ertinya melanggar perintah atau larangan haji yaitu seperti berburu binatang, memakai bahu-bahu¹ dan memakai pakaian yang berjahit terutama mengerjakan perkara-perkara jahat yang memang terlarang di luar haji.

Selain daripada itu orang-orang haji dilarang pula supaya jangan berbantah-bantah atau bergaduh di antara satu sama lain. Dan selain daripada menjauhi segala larangan-larangan Allah yang tersebut di atas, maka apa kebaikan yang mereka

lakukan semuanya diketahui oleh Allah Ia akan membalaunya dengan sebaik-baik pembalasan.

Begitulah! Sebaik-baik hikmah yang didapati di dalam hari raya semua bangsa di dalam dunia ini, ialah dua Hari Raya Islam “Aidil Fitri dan Aidil Adha” yang disambut dan dirayakan dengan secara besar-besaran oleh umat Islam di seluruh dunia.

Aidil Fitri memperlihatkan kesukaan dan kegembiraan kaum Muslimin setelah sebulan lamanya mereka menunaikan fardhu puasa di sepanjang bulan Ramadān dengan mengalami berbagai-bagai perasaan dan menempuhi bermacam-macam percubaan hawa nafsu.

Aidil Adha pula memperlihatkan kegembiraan mereka berhimpun pada

suatu tempat (di Mina) setelah selesainya mereka mengerjakan suatu ibadah yang maha agung iaitu ibadah haji yang mengandungi berbagai-bagai faedah dan hikmah dari segi rohani dan jasmani.

Marilah kita sambut kedua-dua hari raya yang sangat besar ertiinya bagi kita umat Islam dengan perasaan yang penuh dengan keiman dan terhadap keagungan Tuhan yang menjadikan sekalian makhluk.

Selamat hari raya!

Kata-kata Hikmah

Tiap-tiap sesuatu apabila ia banyak harganya jadi murah, kecuali akal semakin banyak semakin mahal.

Sudah terbit

Buku baru

Khalifah ‘Umar bin ‘Abd al-‘Azīz

Khalifah ‘Umar bin ‘Abd al-‘Azīz bukannya sahaja seorang Khalifah yang disegani oleh rakyat jelata di antara khalifah-khalifah Banī Umayyah, tetapi juga baginda adalah seorang Khalifah yang dipandang adil seadil-adilnya untuk menegakkan kebenaran dan hak sesudah Saiyidina ‘Umar bin al-Khaṭṭāb.

Bacalah riwayat hidupnya yang penuh dengan perjuangan menegakkan agama Allah, disusun dengan jalan bahasa yang mudah difaham dan senang dibaca oleh semua peringkat.

Pesanlah dari sekarang
daripada penerbitnya:

Harga sebuah
\$1.40

QALAM

356/8 Geylang Road Singapura 14.

¹ Perkataan sebenar ialah bau-bauan.